

## AI LETORS

Ancje pal nestri sfuei al è rivât il moment di ganbiâ lunari, di tacâ un an gnûf. Al sarâ ce che Diu orà ma lui nus à dade ancje une crepe di doprâle e doprâle ben.

Par lâ indenant a coventin ideis. Se nond'è, al è miei sierâ barache. Ma ancje lis ideis però e àn di girâ, di rivâ a tanc' di lôr, di diventâ un mût di capî la nestre «storie» o liende furlane. Par chest, un gjornalut, par piçul e sclet ch'al seti, al covente tanche l'aghe di bevi. Il gjornâl, po, al à di sei libar e alore si à di pajâlu. Chêi che us rivin a grâtis e che nissun nol domande mai un sentêsin o che ju spedîs il Pari Eterno o che ju pae cualchidun sotvîe e chel al è il vêr paron dal vapôr. I sfueis a grâtis no son mai libars.

Par chest us domandìn ancje chest an di dâ une man.

Il scjalìn plui bas, ma ch'al covente al è chel dai bêz. Al cres dut, ancje il prêsit dal lidric (ma no il lidric), pa la cuâl tocjarâ cressi alc ancje l'abonament.

Pal '80 i prêsiz a saran chesc':

- abonament normâl (Friûl e Italie) 7.000 fr.
- abonament pal forest (Europe) 10.000 fr.
- abonament di lâ dal poç (aereo) 12.000 fr.
- sustignidôr: daûr che us trai il cûr.

Un mût avonde fassil al è di fâj rivâ il gjornâl a di un amî. Pal prin an, però, senò si use malamentri.

Si ûl sperâ che lis puestis a funzionin un miei che no chest an, in mût di no fâ chês parz che cualchidun al à pajât e no j rive il gjornâl.

Ma il mût plui biel di judâ un gjornâl, par chêi ch'a son di chê inopinon, al è chel di leilu, di fâlu lei, di fâ in mût che chestis ideis a vadin pes cjasis, là che si lavore, tes scuclis, dapardut là che si sta zujant il distìn dal nestri Friûl. E la nestre idèe, lu saveis, e jè di rivâ a dâ dongje un partît popolâr dut nestri, usance chêi ch'a jan cjapât pît sù pes monz dal Sud-Tirol e de Valdoste, un partît dai Furlans-Furlans.

E po o veis di scrivi ce ch'ò pensais, ce ch'ò saveis, cence bassilâ tant pe grafie. Scriveit come che us à insegnât a cjararâ vuestre mâri. Par un sbit di acent, si sta pôc a cunbinâ. No steit mo a doprâ chês matetâz che si viôt ca e là, ch'a finissin dome par fâ odeâ il furlan e che no lis doprin nancje i maz.

Abonâsi, lei, scrivi, tirâ dongje int di fede furlane fintremai te mevole. No fasarìn granc' articulons sul prin, secont e tierc mont e nancje no larìn tant in sù te stratosfere. O cirarìn, come ch'o vin fat, di bati chê e sinpri chê. «L'inpuartant — nus à dit zà fa d'is Marchi — al è di no lassâ mai distudâ la lum de furlanetât».

Dut achì e nuje di mancul.

Cun tune granpade di augûrs pal an ch'al ven.

Novembar 1979

pre Antoni Beline